



REPUBLIKA E SHQIPËRISË
Kuvendi

PROJEKT LIGJ

Nr._____/2019

PËR

DISA NDRYSHIME DHE SHTESA NË LIGJIN NR.9942,
DATË 26.6.2008, “PËR PARANDALIMIN E ÇRREGULLIMEVE
TË SHKAKTUARA NGA PAMJAFTUESHMËRIA E JODIT
NË ORGANIZMIN E NJERIUT”, TË NDRYSHUAR

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave, Kuvendi i Republikës së Shqipërisë

V E N D O S I:

Në ligjin nr.9942, datë 26.6.2008, “Për parandalimin e çrregullimeve të shkaktuara nga pamjaftueshmëria e jodit në organizmin e njeriut”, të ndryshuar, bëhen ndryshimet dhe shtesat, si më poshtë vijon:

Neni 1

Në të gjithë përmbajtjen e ligjit emërtimi “... ministri/a i/e shëndetësisë ...” zëvendësohet me “... ministri/a përgjegjës/e për shëndetësinë...”

Neni 2

Në nenin 3, termat “Konsum direkt” dhe “Konsum indirekt” zëvendësohen, përkatësisht, me “Konsum i drejtpërdrejtë” dhe “Konsum i tërthortë”.

Neni 3

Në nenin 6, pas paragrafit të parë shtohen paragrafët, si më poshtë vijon:

“Lejohet importimi i kripës ushqimore të pajodizuar vetëm me qëllimin e fortifikimit të kripës me jod, nga subjekte të licencuara për këtë qëllim, sipas legjislacionit në fuqi për licencimin.

Lejohet përdorimi i kripës së pajodizuar në prodhimin e ushqimeve, përgatitja e të cilave parashikon, domosdoshmërisht, përdorimin e kripës së pajodizuar. Këto ushqime përcaktohen me udhëzimin e përbashkët të ministrit përgjegjës për shëndetësinë dhe ministrit përgjegjës për ushqimin.

Lejohet eksporti i kripës së pajodizuar dhe i ushqimeve të prodhuara me kripë të pajodizuar në vende ku nuk ekziston ndalimi i përdorimit të kripës së pajodizuar.”.

Neni 4

Neni 12 riformulohet, si më poshtë vijon:

“Neni 12 Kontrolli i kripës së jodizuar

1. Kripa e jodizuar, e prodhuar ose e importuar, e destinuar të tregtohet në Republikën e Shqipërisë, është objekt kontrolli.
2. Kontrolli i kripës së jodizuar përfshin veprimtaritë e mëposhtme:
 - a) Monitorimin, i cili kryhet nga drejtoritë rajonale dhe vendore të shëndetësisë;
 - b) Inspektimin, i cili kryhet nga inspektorati që mbulon fushën e shëndetësisë.
3. Ministri përgjegjës për shëndetësinë, për përcaktimin e nivelit të jodit në kripën e jodizuar, përcakton institucionet shëndetësore që do të kryejnë analizat.
4. Kontrolli i kripës së jodizuar, për përcaktimin e nivelit të jodit në mostrën e kripës së jodizuar, bëhet nëpërmjet analizave laboratorike, në përputhje me legjislacionin në fuqi dhe sipas rekomandimeve të OBSH-së, ICCIDD-it dhe UNICEF-it.”.

Neni 5

Pas nenit 12 shtohet neni 12/1, si më poshtë vijon:

“Neni 12/1
Kontrolli i kripës së jodizuar në pikat doganore

1. Kripa e jodizuar, që importohet në Republikën e Shqipërisë nga subjektet importuese, i nënshtrohet kontrollit në pikat doganore (degët doganore kufitare). Ky kontroll realizohet nga autoriteti doganor, drejtoritë rajonale dhe vendore të shëndetësisë dhe inspektorati që mbulon fushën e shëndetësisë.
2. Për kripën e jodizuar të importit, edhe në rastet kur në dokumentet shoqëruese është pasqyruar niveli i jodit, importuesi është i detyruar të kryejë analizën laboratorike për nivelin e jodit në çastin e futjes së kripës në pikën doganore.
3. Shpenzimet për marrjen e mostrave dhe kryerjen e analizave laboratorike të nevojshme për kontrollin e kripës së jodizuar përballohen nga operatori i biznesit ushqimor përgjegjës për ngarkesën. Tarifat përcaktohen me vendim të Këshillit të Ministrave.”.

Neni 6

Neni 13 riformulohet, si më poshtë vijon:

“Neni 13
Monitorimi i kripës së jodizuar

1. Monitorimi i nivelit të jodit në kripë në pikat e prodhimit në vend, në ato të importimit dhe në pikat e shitjes me pakicë/shumicë kryhet nga drejtoritë rajonale dhe vendore të shëndetësisë, në përputhje me legjislacionin që rregullon veprimtarinë e tyre.
2. Prodhuesi i kripës së jodizuar në vend dhe importuesi i saj janë përgjegjës për cilësinë e kripës së jodizuar.”.

Neni 7

Pas neni 13/1 shtohet neni 13/2, me këtë përmbajtje:

“Neni 13/2
Kërkesat për gjurmueshmërinë e kripës për konsum human, shtazor dhe përdorim në industrinë ushqimore

1. Operatori i biznesit ushqimor krijon dhe mban informacionin e nevojshëm për gjurmueshmërinë në të gjitha fazat e prodhimit, përpunimit, jodizimit të kripës dhe shpërndarjes së saj.
2. Informacioni i nevojshëm për gjurmueshmërinë përfshin këto të dhëna:
 - a) Identitetin e çdo subjekti tregtar/personi juridik apo fizik, nga i cili operatori i biznesit ushqimor është furnizuar me kripë;
 - b) Identitetin e çdo subjekti tregtar, të cilin operatori i biznesit ushqimor e ka furnizuar me kripë.
3. Operatori i biznesit ushqimor ruan të dhënat e përcaktuara në pikën 2, të këtij neni, për jo më pak se 3 vjet dhe siguron që këto të dhëna t'i jepen menjëherë ministrisë përgjegjëse për shëndetësinë dhe inspektoratit përgjegjës për shëndetësinë.
4. Kripa ushqimore e nxjerrë në treg ose që mund të nxirret në treg duhet të etiketohet e të identifikohet nëpërmjet dokumenteve dhe çdolloj informacioni tjetër, për të siguruar gjurmueshmërinë.”.

Neni 8

Në pikën 2, të nenit 21, pas fjalëve “... të nenit 11 ...” shtohen “... dhe të pikës 3, të nenit 12/1...”.

Neni 9 **Hyrja në fuqi**

Ky ligj hyn në fuqi 15 ditë pas botimit në “Fletoren zyrtare”.

K R Y E T A R I

GRAMOZ RUÇI